

Na osnovu čl. 200. stav (17) i (18) i 248. Zakona o bankama ("Službene novine Federacije BiH", broj: 27/17), člana 5. stav (1) tačka h) i člana 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj: 75/17) i člana 12. stav (1) tačka d) Statuta Agencije za bankarstvo Federacije Bosne i Hercegovine ("Službene novine Federacije BiH", broj: 03/18), Upravni odbor Agencije za bankarstvo Federacije Bosne i Hercegovine, na sjednici održanoj dana 29.03.2018. godine donosi

ODLUKU O OSNIVANJU BANKE ZA POSEBNE NAMJENE

I. OPŠTE ODREDBE

Član 1.

Predmet odluke

Ovom odlukom propisuju se način primjene instrumenta banke za posebne namjene, odnosno propisuje se sadržaj dokumenata i dokaza koji se dostavljaju prilikom osnivanja banke za posebne namjene i način propisivanja mogućnosti prijenosa imovine, prava i obaveza banke u restrukturiranju na banku za posebne namjene, kao i mogućnost prijenosa imovine, prava i obaveza banke za posebne namjene nazad na banku u restrukturiranju, uključujući definisanje aktive i pasive koja se prebacuje na banku za posebne namjene u vrijeme osnivanja banke za posebne namjene.

Član 2.

Primjena instrumenta banke za posebne namjene

- (1) Instrument banke za posebne namjene provodi se prijenosom:
 - a) dionica ili drugih vlasničkih instrumenata koje je izdala jedna ili više banaka u restrukturiranju na banku za posebne namjene,
 - b) imovine, prava ili obaveze jedne ili više banaka u restrukturiranju u cijelosti ili djelomično na banku za posebne namjene.
- (2) Agencija donosi rješenje o primjeni instrumenta banke za posebne namjene te podnosi prijedlog Vladi Federacije Bosne i Hercegovine, odnosno Federalnom ministarstvu finansija (u daljem tekstu: Ministarstvo) da osnuje banku za posebne namjene.

II. OSNIVANJE BANKE ZA POSEBNE NAMJENE

Član 3.

Osnivanje banke za posebne namjene

Banka za posebne namjene je pravno lice koja je u potpunosti ili djelomično u državnom vlasništvu.

Član 4.

Cilj osnivanja i djelatnost

- (1) Banka za posebne namjene osniva se s ciljem održavanja kontinuiteta ključnih funkcija i prodaje banke u restrukturiranju.
- (2) Djelatnost banke za posebne namjene organizirana je na konzervativan način koji omogućuje njenu pripremu za prodaju.

Član 5.

Akti potrebni za osnivanje banke za posebne namjene

Za osnivanje banke za posebne namjene prilaže se:

- a) osnivački akt;
- b) statut;
- c) dokaz o uplati minimalnog osnivačkog kapitala;
- d) prijedlog članova nadzornog odbora i uprave s podacima o njihovim kvalifikacijama, stručnom znanju, iskustvu, poslovnoj reputaciji i ugledu;
- e) strategija i profil rizika;
- f) poslovni plan;
- g) na zahtjev Agencije i druge akte.

Član 6.

Osnivački akt banke za posebne namjene

- (1) Banka za posebne namjene osniva se ugovorom o osnivanju.
- (2) Osnivački akt iz stava (1) ovoga člana obavezno sadrži:
 - a) naziv i sjedište osnivača;
 - b) naziv i sjedište banke za posebne namjene;
 - c) djelatnost, uključujući cilj osnivanja;
 - d) prava i obaveze osnivača;
 - e) iznos osnivačkog kapitala;
 - f) oznaku klase, ukupan broj i nominalnu vrijednost dionica, uključujući opis prava sadržanih u dionici;
 - g) način i iznos prijenosa imovine, prava i obaveze u slučaju kada se na banku za posebne namjene prijenosi imovine, prava ili obaveza banke u restrukturiranju u cijelosti ili djelomično;
 - h) način naknade troškova osnivanja;
 - i) organe upravljanja i rukovođenja;
 - j) upravljanje rizicima i način pokrića gubitaka;
 - k) dužinu trajanja banke za posebne namjene koja ne može biti duža od 2 godina od dana posljednjeg izvršenog prijenosa dionica, odnosno imovine, prava i obaveza;
 - l) uslove za produženje roka iz tačke k);
 - m) ime i prezime osobe koje predstavlja banku za posebne namjene u postupku osnivanja.

Član 7.

Statut banke za posebne namjene

Statut banke za posebne namjene obavezno sadrži:

- a) naziv i sjedište banke za posebne namjene;
- b) djelatnost, uključujući cilj osnivanja;
- c) prava i obaveze osnivača;
- d) iznos osnivačkog (dioničkog) kapitala;
- e) oznaku klase, ukupan broj i nominalnu vrijednost dionica, uključujući opis prava sadržanih u dionici;
- f) iznos prenijete imovine, prava i obaveze u slučaju kada se na banku za posebne namjene prijenosi imovina, prava ili obaveza banke u restrukturiranju;
- g) način rada skupštine;
- h) način izbora, broj članova i nadležnost nadzornog odbora;
- i) način izbora, broj članova i nadležnost uprave;
- j) utvrđivanje naknada i načina isplate članovima nadzornog odbora, plaća i drugih primanja članovima uprave i uposlenicima s posebnim ovlaštenjima te njihova prava i obaveze;
- k) obaveze i prava uposlenika sa posebnim ovlaštenjima;
- l) predstavljanje i zastupanje banke za posebne namjene;
- m) broj i vrstu komisija, odnosno odbora koje imenuje nadzorni odbor ili uprava;

- n) odredbe o kontrolnim funkcijama;
- o) odredbe o sistemu interne kontrole;
- p) odredbe o eksternoj reviziji;
- n) dužinu trajanja banke za posebne namjene;
- o) način donošenja opštih akata.

Član 8.

Dozvola za rad banke za posebne namjene

- (1) Agencija izdaje privremenu dozvolu za rad banke za posebne namjene ako ispunjava uslove iz člana 200. Zakona o bankama (u daljem tekstu: Zakon) i čl. 5., 6., i 7. ove odluke.
- (2) O zahtjevu iz stava (1) ovoga člana Agencija odlučuje najkasnije u roku od dva radna dana od dana zaprimanja kompletnog zahtjeva.
- (3) Banka za posebne namjene mora zadovoljavati sve bonitetne zahtjeve.
- (4) Agencije na zahtjev osnivača kada je to potrebno za postizanje ciljeva restrukturiranja može izdati dozvolu za rad banke za posebne namjene iako nisu ispunjeni uvjeti iz st. (1) i (3) ovoga člana.
- (5) U slučaju izuzeća iz stava (4) ovoga člana određuje se rok izuzeća koji ne može biti duži od 6 mjeseci.
- (6) Nakon dobivanja dozvole za rad, banka za posebne namjene dužna je bez odgađanja obavijestiti zainteresirana lica u dijelu u kojem se osnivanje banke za posebne namjene na njih odnosi.

III. ORGANI UPRAVLJANJA BANKE ZA POSEBNE NAMJENE

Član 9.

Prethodna saglasnost za članove nadzornog odbora

- (1) Osnivač banke za posebne namjene podnosi Agenciji zahtjev za davanje prethodne saglasnosti za članove nadzornog odbora zajedno s aktima iz člana 5. ove odluke za period za koji je osnovana banka za posebne namjene.
- (2) Član nadzornog odbora može biti lice koje mora ispunjavati najmanje sljedeće uslove:
 - a) ima odgovarajuće kvalifikacije, stručna znanja, vještine i iskustvo potrebno za ispunjavanje obaveza iz nadležnosti nadzornog odbora;
 - b) dobar ugled, uključujući ponašanje na temelju kojeg se može zaključiti da će savjesno obavljati poslove člana nadzornog odbora;
 - c) nije u sukobu interesa u odnosu na banku u postupku restrukturiranja, dioničare banke u postupku restrukturiranja;
 - d) nije u sukobu interesa u odnosu na banku za posebne namjene;
 - e) ispunjava ostale uslove propisane zakonom i aktima Agencije.
- (3) Ispunjavanje uslova iz stava (2) ovoga člana, vodeći računa o cilju osnivanja i djelatnosti banke za posebne namjene, cijeni se u skladu s Odlukom o uslovima i postupku za izdavanje i odbijanje izdavanja saglasnosti za izbor, odnosno imenovanje članova nadzornog odbora i uprave banke i ukidanje izdatih saglasnosti,
- (4) Dokazi iz stava (3) ovoga člana ne mogu biti stariji od 3 mjeseca.
- (5) Ako se akti iz stava (3) ovog člana dostavljaju na stranom jeziku moraju biti prevedeni od strane ovlaštenog prevoditelja na jedan od službenih jezika koji se koriste u Federaciji Bosne i Hercegovine.
- (6) Rješenje za davanje prethodne saglasnosti za članove nadzornog odbora Agencija će donijeti u roku od dva radna dana od dana podnošenja zahtjeva s kompletnom dokumentacijom.
- (7) U slučaju promjena članova nadzornog odbora u toku rada banke za posebne namjene osnivač podnosi Agenciji zahtjev za davanje prethodne saglasnosti za novog člana nadzornog odbora

te uz isti prilaže potrebnu dokumentaciju iz stava (3) ovog člana, kao i odluku o razrješenju dotadašnjeg člana nadzornog odbora s detaljnim obrazloženjem razrješenja.

- (8) Rješenje po zahtjevu za izdavanje prethodne saglasnosti iz stava (7) ovoga člana Agencija će donijeti u roku iz stava (6) ovog člana.

Član 10.

Ukidanje saglasnosti za članove nadzornog odbora

- (1) Agencija će ukinuti saglasnost za člana nadzornog odbora ukoliko prestane ispunjavati uslove propisane zakonom i članom 9. ove odluke.
- (2) Banka za posebne namjene dužna je u roku od pet dana od dana dostavljanja rješenja iz stava (1) ovoga člana pokrenuti postupak u skladu s članom 9. ove odluke za imenovanje novog člana nadzornog odbora.

Član 11.

Prethodna saglasnost za članove uprave

- (1) Osnivač banke za posebne namjene podnosi Agenciji zahtjev za davanje prethodne saglasnosti za članove uprave zajedno s aktima iz člana 5. ove odluke za period za koji je osnovana banka za posebne namjene.
- (2) Član uprave može biti lice koje mora ispunjavati najmanje sljedeće uslove:
- ima odgovarajuće kvalifikacije, stručna znanja, vještine i iskustvo potrebno za obavljanje poslova iz nadležnosti uprave, uključujući poslove restrukturiranja;
 - dobar ugled, uključujući ponašanje na temelju kojeg se može zaključiti da će pošteno i savjesno obavljati poslove člana uprave;
 - nije u sukobu interesa u odnosu na banku u postupku restrukturiranja, dioničare banke koja je u postupku restrukturiranja ili članove nadzornog odbora;
 - nije u sukobu interesa u odnosu na banku za posebne namjene;
 - zadovoljava ostale uslove propisane zakonom i aktima Agencije.
- (3) Ispunjavanje uslova iz stava (2) ovoga člana, vodeći računa o cilju osnivanja i djelatnosti banke za posebne namjene, cijeni se u skladu s Odlukom o uslovima i postupku za izdavanje i odbijanje izdavanja saglasnosti za izbor, odnosno imenovanje članova nadzornog odbora i uprave banke i ukidanje izdanih saglasnosti.
- (4) Dokazi iz stava (3) ovoga člana ne mogu biti stariji od 3 mjeseca.
- (5) Ako se akti iz stava (3) ovoga člana dostavljaju na stranom jeziku moraju biti prevedeni od strane ovlaštenog prevoditelja na jedan od službenih jezika koji se koriste u Federaciji Bosne i Hercegovine.
- (6) Rješenje za davanje prethodne saglasnosti za članove uprave Agencija će donijeti u roku od dva dana od dana podnošenja zahtjeva s kompletnom dokumentacijom.
- (7) U slučaju promjena člana uprave osnivač banke za posebne namjene podnosi Agenciji zahtjev za davanje prethodne saglasnosti za novog člana uprave te uz isti prilaže potrebnu dokumentaciju iz stava (3) ovog člana, kao i odluku o razrješenju dotadašnjeg člana uprave s detaljnim obrazloženjem razrješenja.
- (8) Rješenje po zahtjevu za izdavanje prethodne saglasnosti iz stava (7) ovoga člana Agencija će donijeti u roku iz stava (6) ovog člana.
- (9) Banka za posebne namjene dužna je Agenciji dostavi zaključen ugovor o radu za direktora i za članove uprave u roku od 5 dana od dana potpisivanja istih.

Član 12.

Ukidanje saglasnosti za članove uprave

- (1) Agencija će ukinuti saglasnost za člana uprave ukoliko prestane ispunjavati uslove propisane zakonom i članom 11. ove odluke.

- (2) Banka za posebne namjene dužna je u roku od pet dana od dana dostavljanja rješenja iz stava (1) ovoga člana pokrenuti postupak u skladu s članom 11. ove odluke za imenovanje novog člana uprave.

Član 13.

Naknade, plaće i dužnosti

- (1) Naknade članovima nadzornog odbora i plaće i druga primanja članovima uprave i uposlenicima isplaćuju se u skladu sa odredbama statuta banke za posebne namjene u kojem su propisane i njihove dužnosti.
- (2) Agencija daje saglasnost na naknade i plaće članovima nadzornog odbora i uprave banke za posebne namjene.
- (3) Agencija kod davanja saglasnosti iz stava (2) ovoga člana uzima u obzir visinu sredstava osiguranih za poslovanje banke za posebne namjene, iznos imovine i obaveza i poslovne rezultate.

IV. STRATEGIJA I RIZIČNI PROFIL BANKE ZA POSEBNE NAMJENE

Član 14.

Strategija i profil rizika banke za posebne namjene

- (1) Banka za posebne namjene dužna je donijeti strategiju i profil rizika.
- (2) Agencija odobrava strategiju i profil rizika iz stava (1) ovoga člana.
- (3) Banka za posebne namjene dužna je akt iz stava (1) ovoga člana razmatrati periodično, a na zahtjev Agencije i češće.
- (4) Banka za posebne namjene, u slučaju izmjene činjenica i okolnosti iz člana 15. ove odluke, dužna je dostaviti Agenciji izmjenu strategije i profila rizika. Agencija daje saglasnost na dostavljenu izmjenu.

Član 15.

Sadržaj strategije i profila rizika

- (1) Strategija i profil rizika iz člana 14. stav (1) ove odluke najmanje mora sadržavati sljedeće:
 - a) procedure za upravljanje rizikom;
 - b) odredbe o upravljanju rizikom likvidnosti;
 - c) odredbe o internoj reviziji;
 - d) odredbe o sprečavanju pranja novca i finansiranju terorističkih aktivnosti;
 - e) odredbe o eksternalizaciji.
- (2) Uz strategiju iz stava (1) ovoga člana banka za posebne namjene prilaže Poslovni plan i finansijske projekcije.
- (3) Poslovni plan iz stava (2) ovoga člana uključuje najmanje sljedeće:
 - a) lociranje usluga;
 - b) odgovorna lica za izvršavanje pojedinih segmenata plana;
 - c) unutarnju organizaciju, uključujući linije izvještavanja;
 - d) uposlenike i način provođenja interne kontrole;
 - e) finansijski plan;
 - f) eksternalizaciju.
- (4) Finansijske projekcije iz stava (2) ovoga člana uključuju najmanje sljedeće informacije:
 - a) račune prihoda i rashoda;
 - b) bilansa stanja;
 - c) koeficijente kapitala i likvidnosti;
 - d) detaljan opis korištenih pretpostavki.

V. NAČIN PRENOSA IMOVINE, PRAVA I OBAVEZA

Član 16.

Način prenosa imovine, prava i obaveza banke u postupku restrukturiranja na banku za posebne namjene

- (1) Ako je rješenjem o restrukturiranju određeno da se na banku za posebne namjene izvrši prenos imovine, prava ili obaveza banke u restrukturiranju u cijelosti ili djelomično, Agencija provodi postupak prijenosa imovine, prava i obaveza banci za posebne namjene u skladu s članom 200. Zakona i odredbama ove odluke;
- (2) Agencija može na banku za posebne namjene više puta izvršiti prijenos iz stava (1) ovog člana.
- (3) Kod prenosa imovine, prava i obaveza, ukupna vrijednost obaveza prenesenih na banku za posebne namjene, ne smije biti viša od ukupne vrijednosti prava i imovine prenesenih s banke u restrukturiranju ili prava i imovine osiguranih iz drugih izvora.
- (4) Agencija u skladu sa stavom (3) ovoga člana određuje naknadu za prenesenu imovinu, prava i obaveze u skladu s principima koji su utvrđeni za procjenu vrijednosti imovine i obaveza za potrebe restrukturiranja.
- (5) Za prijenos iz stava (1) ovoga člana u skladu s članom 200. stava (2) Zakona nije potrebna saglasnost dioničara banke u restrukturiranju niti bilo koje treće strane.
- (6) Agencija će u slučaju iz stava (1) ovoga člana u svakom pojedinačnom slučaju odrediti stavke aktive i pasive koje će se prenijeti na banku za posebne namjene.

Član 17.

Uslovi vraćanja imovine, prava i obaveza na banku u restrukturiranju

- (1) Agencija može prenijeti imovinu, prava ili obaveze natrag s banke za posebnu namjenu u jednom od sljedećih slučajeva:
 - a) mogućnost da se određena imovina, prava ili obaveze prenesu natrag izričito je navedena u instrumentu kojim je izvršen prijenos;
 - b) određena imovina, prava ili obaveze zapravo ne spadaju u kategorije prava, imovine ili obaveza iz instrumenta kojim je izvršen prijenos imovine, prava ili obaveze, odnosno ne ispunjavaju uslove za njihov prijenos.
- (2) Agencija može da izvrši ovlaštenje iz stava (1) ovoga člana samo ako je:
 - a) situacija na konkretnom tržištu za takvu imovinu takva da bi njihova likvidacija tijekom stečajnog postupka mogla imati negativan utjecaj na jedno ili više finansijskih tržišta;
 - b) takav prijenos neophodan kako bi se osiguralo funkcioniranje banke u restrukturiranju ili banke za posebne namjene;
 - c) takav prijenos neophodan kako bi se ostvarili maksimalni prihodi iz likvidacijskog postupka.
- (3) Prijenos iz stava (1) ovoga člana može se izvršiti u bilo kojem roku navedenom u instrumentu korištenom u tu svrhu i u skladu je sa svim drugim uslovima koji su u njemu navedeni.

VI. PRELAZNE I ZAVRŠNE ODREDBE

Član 18.

Stupanje na snagu

Ova odluka stupa na snagu osmog dana od dana objavljivanja u „Službenim novinama Federacije BiH“.

Broj: U.O.-18-10/18
Sarajevo, 29.03.2018. godine

PREDSJEDNICA
UPRAVNOG ODBORA

mr. sc. Ljerka Marić, dipl.ecc. s.r.